



OL I TREN NAU



Poto antap i soim tupela Nevi leptenan i tren inap long 5 mun long Australia. Long lephan em i Leptenan Michael Aibung bilong Kavieng. Na man namel em i Leptenan Stephen Kager, em tu i bilong Kavieng.

Poto i soim tupela i stap long wampela sip long pasis bilong Sydney na tupela i skul long pasin bilong "sutim" san. Ol i yusim wampela glas i olsem kompas na i ken tokim ol, ol i stap we long biksolwara

Poto i kam long Australian Information Services. Bill Payne i kisim.

Long lephan yu lukim Mista Simon Yuoringle Makui, wampela developmen opisa i wok long Madang. Narapela man em i Mista Inia Move, em tu wampela developmen opisa bilong Rabaul. Tupela i skul long Australia long olkain pasin bilong groim gutpela pik.

Poto i kam long Australian Information Service. Norman Plant i kisim.



Poto long lephan i soim sampela NBC brotkas opisa na stesen menesa i raun long Australia wantaim sampela wanwok bilong ol bilong Zambia, Thailand, Solomon Ailan, na Fiji. Ol i pin winim 6 wik spesel skul na nau ol i raun na lukim olkain wok brotkas inap long 10 Me.

Kirap long lephan yu ken lukim Mista Tau Kila (namba tu stesen menesa bilong Redio Sentral, NBC), Mista Gabriel Deckwalen (namba tu stesen memesa bilong Kundiawa), na Mista Robin Wainetti (NBC stesin menesa bilong Redio Westen, Daru).

I gat 9-pela man bilong PNG i stap long dispela kos.

Poto i kam long Australian Information Service. Barry Le Lievre i kisim.



Poto daunbilu i soim tri-pela edukesen opisa bilong Edukesen i kisim spesel kos inap 10 mun long Adelaide.

Long poto yu ken lukim Mista Alan Cooper - em poroman bilong ol-i wok-

about wantaim Mista Matthew Habe bilong Tari, i save wok long Edukesen Opis long Madang; Mista

Aki Konde bilong Lae, em i hetmasta bilong Hengano School klostu long Goroka; na Mista Vera

Nabone bilong Lae, em hetmasta bilong Huonville Sentral Nesenel Yut Skul.

Poto i kam long Australian Information Services. Douglas McNaughton i kisim.



wantok
National weekly in Melanesian Pidgin.

National weekly in Melanesian Pidgin.

Editorial Offices:
P.O. Box 1982
Boroko

Phone: 25.2214
25.2552
Telex: NE 22213

Branch Offices:
Wewak
Phone: 86.2479

Wabag
P.O. Box 111

Advertising:
In P.N.G.
Ms. Penny Donald
Phone: 25.2214

In Australia:
Kevin Engel
8 Duraba Pl.
Caringbah (2229)
Phone: 525.6263

Subscription Rate:
Annual: K8.00



SKULIM HUSAT ?

Dipatmen bilong Edukesen i gat sampela grup opisa i wok long raun nau long ol provins bilong bungim olkain tingting na aidia. Ol i laik wokim nupela program bilong ol skul inap long neks faiv yia.

Wantok i laik bai olgeta rida bilong en i traim bungim ol dispela spesel opisa na helpim ol, tok-tok wantaim ol, givim aidia long ol. Bikos edukesen na wok skul em i bikpela samting tru long dispela kantri, Wantok i laik autim sampela aidia hia bilong kirapim tingting bilong yu na ol dispela opisa i raun nau.

Namba wan samting i mas klia tru: edukesen em i wanem samting? Edukesen i no min, pasin long go long skul tasol. Nogat. Edukesen em i samting bilong ol bikpela manmeri tu. Yumi save kisim edukesen o moa save inap yumi indai. Ol lapun tu i pulimapim nupela save olgeta de. Edukesen i no samting bilong ol manki tasol. Nogat.

Ol bikpela manmeri tu i mas skul long rit na rait. Konstitusen bilong yumi i tok klia olsem: "Olgeta dipatmen bilong gavman i mas wok long helpim olgeta manmeri long PNG long lainim rit na rait long tok Pisin o tok Motu o tok Inglis o tok ples."

Inap nau dispela pasin bilong skulim ol bikpela manmeri long rit na rait, em ol misin na sios i save mekim. Gavman i no bin wari tumas long en. I helpim liklik tasol. Na mipela i ting em i no stret. Mipela i ting gavman i mas makim moa mani long skulim ol bikpela manmeri - na i no long skulim ol manki tasol. Yu lukim: ol manki i no inap senisim ol samting na mekim ol samting i go het. Ol i yangpela tumas na i no gat save. Ol bikpela manmeri i gat planti save pinis, na sapos ol inap rit na rait, ol i ken mekim planti moa long helpim kantri i go het.

Edukesen dipatmen i sot long mani. Em i tru. Tasol planti arapela dipatmen bilong gavman i save makim mani long skulim ol pipel long wok bilong ol, long edvetais, long printim ol liklik niuspepa bilong ol. Ating planti taim dispela mani i no karim gutpela kaikai. Mipela i ting, mobeta ol dispela dipatmen i bungim dispela mani insait long wanpela dipatmen stret, na em i ken wari long skulim ol bikpela manmeri.

Edukesen Dipatmen i toktok na i wari bikos mak bilong edukesen i bin, pundaun. Dispela mak, em i bilong ol manki tasol, o bilong olgeta manmeri? I no gat mak bilong ol bikpela manmeri. Ol i kisim liklik nating. Olsem, ating nau ol tu bai kisim sampela helpim. . . .

Long mun Februari 11-pela spesel edukesen opisa bilong ol Pasifik kantri i bin kibung long Noumea (lukim pes 7) na ol i strong long dispela samting: yumi mas skulim moa bikpela manmeri. Mipela long Wantok, mipela i wantingting long ol.

SKRAP LONG MANI PAULIM PLANTI

Inap long wan wik long mun Epril ol bisop bilong 17 daiosis bilong Katolik Sios long Papua Niugini na Solomon Ailans i kibung long Tsiroge long Not Solomons. Dispela lain bisop i makim moa olsem 600,000 memba bilong Katolik Sios long dispela hap bilong graun.

Ol i paitim tok long ol wok na wari bilong ol daiosis bilong ol na autim tingting bilong Katolik Sios long wan wan samting long kantri. Hia mipela i printim sampela tingting bilong ol.

KONSTITUSEN

Long 16 Septemba 1975 yumi bin kisim independens na i amamas tru long en na i wetim gutpela taim tru i laik kamap painim kantri bilong yumi. Na i gat gutpela as bilong dispela amamas. Long wanem kantri i bin stat na i sanap strong antap long pos bilong Konstitusen, em bikpela lo tru bilong kantri.

Dispela Konstitusen i autim planti Kristen tingting. Na planti man i bin raitim, em ol i gutpela Kristen. Dispela Konstitusen i tok: Yumi mas lukaut gut long ol man, long bodi na spirit bilong em wantaim. Em i tok tu, olgeta pipel i wankain aninit long lo. Na wok bilong Konstitusen na kantri em i long lukaut bai olgeta wan wan manmeri i fri na i gat rait bilong em stret.

Dispela Konstitusen i stap yet, na em i no bin senis liklik. Nogat. Em i

makim gutpela rot tru bilong kantri na ol pipel bilong em. Tasol mipela ol bisop i lukim na i pilim kain kain samting nogut i bin surik i kam insait long laip bilong ol pipel. Na ol dispela samting i wok egens long Konstitusen.

Olgeta de yumi ken harim long redio na lukim long niuspepa olkain stori i soim planti pipel bilong Papua Niugini i paul nabaut nau. Olgeta de yumi harim tok long pasin stil, brukim haus, trik pasin long bisnis, pasin bekim, pretim man, kain kain pait namel long ol lain, pasin spak.

OL SAMTING BILONG GRAUN I WIN

Wanpela bikpela trabel insait long kantri tude, em i dispela pasin gridi, gridi long kisim oltaim moa na moa mani. Taim Konstitusen i tok long yumi mas gro olsem manmeri tru, em i no min yumi mas kisim

planti mani na gutpela sindaun tasol. Yumi gat spirit tu. Konstitusen i min spirit tu i mas gro. Tasol tude planti pipel i taitim bun long winim mani tasol - maski ol i kisim long wanem kain pasin - gutpela pasin o pasin nogut.

Dispela kain pasin gridi em i no pasin Kristen. Em i save kirapim pasin giaman na pasin trik na pasin stil na pasin bilong krungutim arapela man. Taim yumi rit o harim olsem wanem ol sampela stilman i brukim haus bilong ol pipel yet na stilim samting bilong narapela man, yumi wari long trupela go het bilong dispela kantri. Tude ol turis yet i stat long pret long kamap long Papua Niugini. Nogut nem nogut i karamapim dispela kantri.

OL LAIN I PAIT PAIT I GO

Pasin bilong bekim, pa
(i go moa long pes 6)

Kirap long lephan yu lukim: Asbisop Herman ToPaivu bilong Port Moresby, Bisop Louis Vangeke bilong Bereina, Bisop Gregory Singkai bilong Not Solomons, na Monsinia George Bata i makim Rabaul long kibung bilong ol bisop.





TOK BEK LONG MARIT

Dia Edita - Nau mi laik traim bekim dispela askim bilong wantok ya Mista Wike Sinai. Em i bin askim olsem long Wantok Nius long 18 Mas, 1978.

Man i salim meri bilong em na kisim mani, em i bagarapim marit o nogat? Yes em i bikpela sin, bilong wanem tupela i brukim Lo. Dispela lo tupela yet i bin autim taim tupela i marit. Taim ol manmeri i laik marit ol pasto i save askim man na meri olsem: Man, yu laik kisim dispela meri i marit long yu na yutupela i bihainim lo bilong God? Yu laik marimari long em na helpim em na bai yu lusim ol arapela meri na holim dispela tasol inap long taim matmat i katim marit bilong yutupela? Na man bai tok olsem: Mi laikim olsem. Na bihain pasto i askim wankain askim olsem long meri na meri bai tok olsem tu.

Mi laik tok olsem: Dispela tok tupela i save autim long ai bilong planti manmeri na tu long ai bilong God insait long haus lotu. Na bihain gen tupela i save mekim dispela pasin, em tupela i save brukim lo bilong marit na tupela i gat bikpela sin.

Yes brata Wike, yu laik save tru long dispela, orait yu kisim Nupela Testamen bilong yu na painim long namba wan Pas bilong Pol i go long ol Korin. Long I Korin Sapta 6 na ves 12 i go 20, yu kaunim dispela na bai yu lukim sampela tok long ves 13 na ves 15-16, na tu long ves 18-19. Dispela tok bai inap long kliaim tingting bilong yu.

Em tasol na mi laik skruim tok olsem: Yes ol wantok, ples bilong yupela graun i bruk na rausim yupela o olsem wanem? Sapos yu no gat wok long tauri, orait mobeta yu kisim meri bilong yu na yutupela i go bek long ples bilong yutupela. Wok i no

i stap long taun na siti tasol, na mani tu i no i stap long taun na siti. Nogat tru. Wok i stap long ples bilong yu, na mani i stap long graun bilong yu, na long han bilong yu stret. Yu subim han i go daun long graun na han bilong yu i doti bai yu kisim mani. I no gutpela pasin long yu i no gat wok long taun na yu raun tasol na salim hap bodi bilong yu na kisim mani. Dispela bodi i no bilong yu. Yu tu mas lukim dispela tok i stap long baibel. Em tasol na tenkyu.

H.H. Geoba,
Heldsbach/Finschhafen.

SANGUMA

Dia Edita - Long pas poroman Albert Humblara i bin rait long Wantok Nius long mun Epril 1978. Mi bin ritim na mi amamas o sapotim em long toktok bilong em long ol lida o gavman mas putim bikpela lo long kalabusim ol posin o sanguma man inap ol i dai. Dispela we sapos ol i wokim em bai ol i pret na ol i no inap long wokim wanpela samting.

Mi gat wanpela man olsem i stap long ples i save wokim posin olsem bisnis bilong em. Em i save wokim posin na singaut long peim em sampela mani na pulim pik long mekim gut gutpela. Sapos ol i no save peim em i save larim inap ol i save dai.

Planti man ol i save gut long dispela man na ol i save tingting long kilim em i dai tasol ol i save pret long go kalabus. Em tasol na sapos ol lida ting olsem wanem orait wokim samting long sevim laip bilong ol inap taim bilong ol long dai.

Nau kantri bilong yumi i senis na tingting bilong sampela man i gat kranki long ol save man o meri wok nabaut long taun o siti sapos ol i go long ples. I luk olsem jeles em bikpela long yumi long bagarapim ol man long posin o sanguma.

Em tasol na yu husat i lukim na laik skruim em i orait tu. Tenkyu.

Paully Sinuga,
Popondetta.

KATIM NEK

Dia Edita - Mi gat liklik wari na mi laik autim wari bilong mi i go olsem: Yumi save tok olsem PNG i wanpela kristen kantri na ai bilong mi na tingting bilong mi lukluk i go i ho olsem kristen kantri. Long wanem taim mi save harim long redio olsem man i katim nek bilong man na ol plis i kisim dispela man na i putim ol long kalabus inap long 2 o 3 yia.

Na ol i pinis long kalabus na i kam ausait. Na mekim dispela pasin gen.

Kain pasin olsem na gavman i mas putim wanpela lo, em bai inap. Ating gavman i putim lo olsem bai inap wanpela man i kilim wanpela man, orait ol plis i kisim dispela man na bungim olgeta man meri pikinini na soim ol na sutim dispela man o katim nek bilong em. Bai inap pretim ol man i no ken wokim dispela pasin moa.

Em tasol liklik wari na askim bilong mi. Sapos husat wantok i laik bekim, orait rait tasol long Wantok Niuspepa.

Esty B.
Finschhafen/Lae.

MARIT

Dia Edita - Mi laik autim liklik wari bilong mi. Wari bilong mi i go olsem. Mi no laikim ol waitman i kam long kantri bilong yumi. Na kisim ol blak skin meri. Em i no gutpela pasin tru.

Em i nogut long wanem mi lukim long ai bilong mi na mi tok. Wanpela meri i go marit long ol waitskin man. Na dispela waitman i go bek long kantri bilong em yet. Na lusim meri bi-

long em long Papua Niugini. Na dispela meri i bagarap tru long ol samting. Dispela em i pasin nogut tru.

Mobeta ol i go maritim ol waitskin meri. Yu husat laik rait i kam long mi, orait tasol i go long Wantok.

Kaupa Grai,
Gumine/Simbu

Salim ol pas
i kam long
WANTOK
BOX 1982
BOROKO

TINGTING PASTAIM

Dia Edita - Mi laik bekim pas bilong wantok ya em Oti Teung, bilong Lae. Brata ya em i tok long ol manmeri bilong Lae, i save baim kaikai long Lae maket bihain ol i go na salim gen long ol liklik maket. Em i go het na tok, ating ol dispela manmeri husat i mekim pasin olsem em i olsem ol i no gat bun long wok gaden.

Yes brata, mi askim yu, yu inap long kolim nem bilong provins o sap provins o patrol pos, we ol dispela lain manmeri i kam long em?

Yu save hamas kain kain manmeri i stap long Lae siti, em ol bilong narapela narapela provins?

Yu save hamas mani ol i kisim long wan wan pe de?

Na olsem wanem ol i mekim im dispela kain pasin?

Yu save ol dispela manmeri o l i gat graun lon wokim gaden o nogat Brata mi bilong Lae sif stret, tasol mi no ting ol a graun manmeri stret bilong Lae o Morobe Provins wokim dispela pasin. Yu bagarapim tru olgeta pipe bilong mitupela em i no stret.

Pastaim long yu raitin dispela kain rabis pas bilong yu, yu mas tingting gut long ol askim em i stap antap pastaim, orait yu ken raitim.

Em tasol na tenkyu tru. Mi gat moa long givim yu tasol, sapos yu bekim pa bilong mi long Wantok Niuspepa.

K. Tangapi
Wewak

TAMBU TASIM KOPI

Dia Edita - Mi laik tol aut long pasin bilong o S.D.A. Misin. Ol i no save dringim kopi na watpo ol save baim kopi. Ol save ronim ka bilong ol long kopi faktori na baim kopi. Ol i no save kaikai pik buai, smok, na dringim bia. Ol i no save tasim o dispela samting na watpo ol i tasim skin bilong kopi.

Ol i no save dringim kop orait ol i no ken baim kopi. Na i no ken tasim skin bilong kopi tu. Em tasol mi laik yupela mas raitin dispela stori bilong mi na ol man i ken lukim.

Jackson Rimba K.
Isten Hailans

BONEO PIKSA P.O. Box 217, Finschhafen.

Boneo Piksa em i nambawan ples bilong yupela ken salim ol blak/wait film wantaim ol kala film i kam.

Boneo Piksa bai developim na prinim ol piksa na salim i go bek long yupela wantaim wanpela nupela fri film.

Sapos yu no gat kamera, yu ken baim wanpela long Boneo Piksa. Pe bilong en i no bikpela.

Sapos yu laik save moa long dispela wok, orait, salim pas i kam long:

Boneo Piksa, P.O. Box 217, Finschhafen.

Dia Mista Somare.

Mipela olgeta Katolik bisop i kibung hia long Not Solomons i bung wantaim long tok amamas long yu long dispela nupela tingting bilong gutpela lida yu bin autim na bihainim. Em i gutpela pasin Kristen tru, na i bihainim stret tingting bilong Konstitusen. Mipela i hepi yu bin soim yu lida tru, na yu gat strong, na gutpela save long skelim gut ol aidia i stap insait long Konstitusen.

Inap nau wan wan bisop na sios lida i bin tok amamas long yu. Tasol tude mipela olgeta wantaim i tokaut. Em i namba wan taim mipela i bin kibung long dispela yia. Mipela i hepi tru long dispela wok lida bilong yu. Dispela nupela pasin lida i givim gutpela nem tru long yangpela kantri bilong yumi. Mipela i laik lukim olgeta lida i holim bikpela wok long kantri i orait long dispela tingting bilong yu.

Wantaim moa, mipela i tok amamas long yu. Mipela i promis bai mipela i helpim yu long ol beten bilong mipela, bai God i ken blesim olgeta wok bilong yu.


Mi siaman i raitim dispela pas long nem bilong olgeta bisop.

Mi,


Bisop Firmin M. Schmidt, O.F.M., Cap.

- bisop bilong Mendi

- siaman bilong konprens bilong ol bisop.



Mista Michael Somare



Bisop Firmin Schmidt

MINISTA KROSIM SAMPELA WES IRIAN

Minista bilong Tret na wok wantaim ol arapela kantri, em Mista Ebia Olewale, i bin autim sampela tok save i go long ol sampela Wes Irian pipel i bin kamap sitisen bilong Papua Niugini na nau ol i wok long pait egens long gavman bilong Indonesia. Tok bilong em i go olsem:

Mi bin kirap nogut long lukim na harim nius long wanpela grup paitman bilong Irian Jaya i sindaun namel long yumi na i bin makim 10-pela sitisen bilong PNG olsem kabinet memba long gavman bilong ol.

Dispela ripot i mekim mi bel nogut long sampela pipel insait na ausait long Papua Niugini i laik yusim kantri bilong yumi olsem kem bilong wanpela grup bilong pait ol i kolim "Independen Wes Papua Muvmen".

Dispela lain pipel long pasin bilong ol long givim-aut tok save long ol nius-pepa na radio bilong PNG, i traim mekim mipela i bel gut long ol na tingting bilong ol. Na ol i wok long mekim Papua Niugini na Indonesia i kamap birua.

Mi Minista bilong bosim olgeta wok bilong PNG i go long ol ausait kantri, mi laik tok strong na klia long ol dispela kain pipel i sitisen nau bilong PNG, o i stap tasol insait long PNG na i ting long skruim dispela kain wok i go.

Gavman bilong PNG i ting, Irian Jaya em i wan-

pela hap tru bilong kantri Indonesia. Na gavman bai egensim olgeta liklik lain pipel i stap nau insait long PNG i laik pulim PNG long putim nus bilong em i go insait long wok gavman bilong Indonesia. Dispela gavman bilong mi i tambuim dispela nupela kabinet bilong Independen Wes Papua Muvmen long kirap na stat long PNG. Na gavman i tambuim ol tu long yusim PNG olsem kem bilong wok pait bilong ol.

Olgeta manmeri, na ol sitisen tu bilong dispela kantri, i bung wantaim sampela arapela man long PNG na i wok long brukim lo na mekim rong insait long dispela kantri o narapela kantri, ol bai kot. Sapos man i no sitisen i mekim dispela kain samting, em inap raus olgeta long kantri.

Olgeta ausait pipel i bin kisim tok orait long sindaun insait long PNG na nau ol i wok wantaim dispela Independen Muvmen ol i skrapim bel long mekim PNG na Indonesia i kamap birua. Ol dispela ausaitman i brukim promis ol i bin mekim, taim ol i kisim tok orait long kam insait. Olsem na mipela inap tekewe tiket long ol



na tambuim ol long kam bek insait.

Dispela nius long sampela sitisen bilong PNG i bin kamap memba bilong nupela kabinet bilong "Wes Papua Muvmen" em i bikpela samting nogut. Mipela bai glasim gut tru. Na nau yet mi laik tok stret olsem:

Konstitusen bilong PNG i strong long yumi mas tingting plarti na tingting.

gut bipo yumi larim wanpela man i kamap sitisen. Mipela i no givim sitisensip isi. Nogut tru. Na sapos (i go long pes 10)

Poto i soim Mista Ebia Olewale i sanap wantaim Mista Andrew Peacock, em Foren Minista bilong Australia.

WINIM MANI ISI TUMAS
 PAINIM NA KISIM OLPOLA TAIA I KAM
 MIPELA DUNLOP I SAVE BAIM

LAE: Aircorps Rot - klostu long maket

SKRAP LONG MANI PAULIM PLANTI

(i kam long pes 3)



Bisop Vangeke

sin bilong bekim indai bilong man, pasin bilong winim mani long dispela we na kirapim pait bilong winim dispela mani - ol dispela samting gen em i hangamap long dispela hangre na skrap long mani. Nogut. Dispela pasin bai olsem mak bilong PNG. Planti taim tumas pasin pait namel long tupela lain i kamap long pasin bekim na pasin gridi. Na dispela tupela pasin i no pasin Kristen.

Krais i bin skulim yumi long laikim olgeta manmeri, sapos yumi laik stap trupela memba bilong lain bilong em. Em yet i tok:

“Sapos yupela i laikim tru ol brata, orait, bambai olgeta man i ken save yupela i disaipel bilong mi” (Jon (Jon 13:35). Na Krais i askim moa yet; em i tokim ol disaipel na ol man i bihainim em, ol i mas laikim ol birua yet. Em i tok: “Yupela i mas laikim ol birua bilong yupela. Yupela mas mekim gut long ol man i hetim yupela. Yupela i mas beten long helpim ol man i mekim save long yupela na i toknogutim yupela.” (Luk 6:27)

Pikinini bilong God, em Jisas Krais, i bin kam daun long graun, na i kamap man tru olsem yumi, na i mekim yumi olgeta i kamap brata. Olsem Kristen tru i no ken ting long lain na wantok tasol, long wanem yumi olgeta i wanfamili bilong Krais.

Sori tumas, planti lain long Hailans i tingting long skin na lain bilong ol, na maski tingting bilong Krais. Sapos wanpela memba bilong haus lain i painim birua, o painim

trabel - em i skrap na i sindaun nogut inap long taim em i ken bekim. Sampela taim ol i save bekim na kilim man meri i no bin mekim wanpela liklik rong.



Asbisop Arkfeld

Sapos yumi bihainim dispela pasin bilong bekim bekim tasol, olsem wanem dispela kantri i ken kamap Kristen kantri? Nem Kristen i no pas gut long em. Na sapos i olsem, olsem wanem na kantri bilong yumi i ken go pas na givim gutpela eksampel long ol arapela wansolwara, na poinim pinga long ol kan-

tri i mekim pasin nogut? I no ken. Em i mauswara tasol na trik.

Kilim indai wanpela man meri bilong bekim dai bilong narapela, em i brukim lo bilong God. Gavman tasol i gat dispela strong. Man nating, nogat. Na olgeta man i helpim, na ol manmeri i orait long dispela wok bekim, ol tu i mekim rong.

Olsem na mipela ol bisop i askim olgeta Kristen long pinisim dispela pasin bilong bekim namel long ol lain pipel. Em i no Kristen pasin na em inap bagarapim gutpela nem na sindaun bilong dispela yangpela kantri.

BAIM BODI

Na i gat wanpela nupela pasin i bin kamap long Hailans. Em i pasin bilong singaut long bikpela mani moa sapos wanpela man i lusim laip bilong em long pait o long ka o long haiwe samting. Dispela pasin ol i kolim “baim bodi”. Planti

taim ol i singaut long pe long man i no gat liklik rong. Sampela taim em i asua stret bilong man indai pinis. Tasol nogat, narapela man i mas baim bodi.




Yu ting tasol long wanpela man i ful spak, i wokabout kranki tru na i pundaun long haiwe aninit stret long wil bilong trak o ka i ran. Ka i kilim em; ka i no inap abrusim em. Tasol nogat, wantu ol man i putim asua na hevi long draiva. Tasol draiva i no bin mekim wanpela liklik rong. Dispela kain tingting, dispela kain pasin i no



Bisop Singkai

(i go long pes 8)

Maxell i nem yu ken bilipim. Baim em tasol.



YU KEN BAIM LONG OL DISPELA HAGEMAYER STUA

P.O. Box 673, MADANG
PHONE: 822445

P.O. Box 1428, BOROKO
PHONE: 256144

P.O. Box 90, LAE
PHONE: 423200

P.O. Box 63, RABAU
PHONE: 922633

P.O. Box 11, MT. HAGEN
PHONE: 52 1339

SKULIM MOA BIKPELA MANMERI

(Wanpela ripot i bin kam long Esia-Saut Pasifik Dipatmen bilong Skulim ol Bikpela Manmeri long Canberra, Australia. Ol i autim dispela nius.)

Ol deliget bilong 11-pela kantri long Pasifik na 9-pela arapela spesel saveman i bin kibung long biktaun Noumea long kantri New Caledonia long mun Februeri yet, na i bin autim planti tingting long pasin bilong skulim ol bikpela manmeri.

Het tok bilong ol em dispela: yumi mas skulim ol bikpela manmeri long olkain save i ken helpim tru laip bilong ol. Maski long buksave nating.


Olgeta wan wan deliget i bin tok save long pasin bilong kantri bilong em long skulim ol bikpela manmeri. Ol i bin tok long ol wari na olkain skul na wok ol i save mekim. I no longtaim na olgeta Pasifik kantri ol i sot tru long olkain program long skulim ol manmeri bihain ol i lusim skul pinis, na helpim ol fama na manmeri long ples long kisim moa moa save.

Dispela miting o konprens i ting yumi mas skulim ol bikpela manmeri

moa long olkain samting bilong didiman na graun na fam na wok fama. Na tu ol i mas kisim moa skul long ol pasin bilong tum-buna na bilong ples na kantri - bai ol i ken amamas long ol dispela samting.

Konprens i ting olgeta program bilong skulim ol bikpela manmeri i mas yusim olkain samting i stap pinis long kantri, na skulim ol long wokim na yusim olkain tul na masin i isi long ranim. Ol i ting yumi mas mekim planti wok long ol liklik ples i longwe long taun, na tu yumi mas helpim ol yangpela pipel i no gat wok.

Ol deliget i pilim strong moa, yumi mas yusim moa



redio na brotkas long skulim ol pipel i stap longwe long taun.

Taim ol i bin votim ol opisa long Konprens, ol i bin ilektim Mista Emmanuel Silachot bilong Papua Niugini siaman bi-

long ol, na Misis Marjorie Crocombe bilong Yunivesiti bilong Saut Pasifik long Suva olsem namba tu siaman (siameri).

Mista Julius Chan i tok, ol kopi fama i mas taitim bun tru na bungim olgeta kopi bin, long wanem skel bilong kopi bilong dispela via bai kamap mak ol bai putim long PNG. Antapim tru nau. Em bai helpim tumora tu.



Strong Tru.

HUSKY DYNA

Niupela trak bilong Toyota i save wok hat tru.
Yu laik karim kago o pasindia – long biktaun
o rot nogut long bus – dispela trak em inap.

TOYOTA

BRANCHES
AT:

PORT MORESBY
25 4088

LAE
42 2322

MT. HAGEN
52 1888

ELA MOTORS LIMITED

MADANG
82 2188

RABAU
92 1988


KIETA
95 6083

WEWAK
86 2255

GSP ET 013P

SKRAP LONG MANI PAULIM PLANTI

(i kam long pes 6)



Bisop Copas

stret olgeta. i egens long olgeta Kristen aidia na tingting.

Sapos wanpela Kristen i bihainim dispela aidia, em i mas sem. Em i wanpela pasin gridi i bin kamap insait long 10-pela yia i go pinis.

Dispela pasin i rong, i no stret, i no Kristen. Dispela pasin i mekim bodi na skin inap long wanpela buk mani - em samting bilong baim tasol, samting bilong winim mani. Na tu ol i save singaut long bikpela mani moa, na i mas kamap nau tasol, hariap tru. Dispela em i as bilong planti pait long Hailans.

Dispela pasin "baim bodi" i sakim Konstitusen na lo bilong kantri. Gavman i egens long dispela pasin. Tasol mipela i laik lukim em i no tok nating. Mipela i laik gavman i mas wokim wanpela lo tru bi-

long stapim dispela pasin bilong "baim bodi."

Olgeta Kristen i bihainim dispela kain pasin, i mas glasim gut bel bilong em na askim em yet: em i bihainim tru lo na skul bilong dispela sios em i bin go insait long en, long taim em i kisim baptais. Ating nogat.


BAIM MERI

Long taim bilong ol tumbuna pasin bilong baim meri em i gutpela samting na i save pasim gut marit na i pasim tu ol famili na lain pipel. Tasol wantaim moa dispela pasin gridi, pasin bisnis, pasin bilong skrap long moa moa mani i bin kam insait na prais bilong meri i bin go antap olgeta. Nau sapos man nating i laik marit na baim meri, em i no inap. Prais i antap tumas. Em i mas pulim dinau long planti wanlain na wantok. Na inap planti yia moa - samtaim inap em i dai - em i wok i wok long bekim dispela dinau tasol. Tude sampela man i no, inap painim mani o kisim dinau - olsem na ol i no inap marit olgeta. Em i no stret. Bipo i no olsem.

Sapos mani tasol i bosim

ol samting bilong marit, yumi no inap bihainim Kristen pasin bilong marit. Em pasin bilong laik bilong tupela pipel.

I tru, i no isi long wokim lo bilong baim meri, long wanem i gat kain kain pasin long wan wan provins na wan wan distrik. Ating ol bikpela lida wantaim wanpela loman inap long stretim skel bilong pe bilong meri.



Asbisop To Paivu

Olgeta Kristen hetman na papa i mas tingting pas-taim long painimaut, em i mekim pasin i stret o pasin i gridi, taim em i makim pe bilong pikinini meri. Em i mas askim em yet olsem: "Mi laikim pikinini meri bilong mi i marit na i sindaun gut na hepi." O "mi laik em i maritim dispela man, bikos em inap givim bikpela pe". Yu wari long kisim pe i antap moa? O

yu ting olsem: "Maski, mi laikim sampela pe tasol, bai man i soim em i belgut long mi. Em inap.

PASIN TRIK LONG BISNIS

Sampela nupela trik long wok bisnis i soim tu, planti pipel i bihainim pasin gridi na pasin bilong skrap long mani tasol. Lo bilong bisnis i tok olsem: sapos i gat planti samting, prais bilong samting ya i go daun. Sapos i no gat planti, prais i go antap.

Tasol sampela taim sampela stuakipa na bisnismen i hatiim samting, na i giaman i tok, i no gat moa. Na ol i putim prais i go antap. Sampela taim ol stuaman i save daunim tru prais bilong wanpela samting, bilong pulim ol man i kam insait long stua. Tasol ol i go na apim prais long planti arapela samting long stua. Olsem ol i trikim ol pipel.

Sampela bikpela ausait kampani i save trik olsem: ol i bringim insait sampela nupela samting bilong baim, samting ol i save wokim isi long ples bilong ol. Tasol hia ol i putim bikpela prais antap long en, long wanem em i nupela

la samting na ol pipel i no save long en. Dispela pasin i no stret. Ol pipel i mas lukaut na slo long baim hariap hariap ol nupela samting i save lait long ai bilong ol.


BEKIM

Pasin bilong bekim bek samting yu bin stilim o kisim long stilman, pasin bilong bekim bek samting yu bin giaman na trik na winim - dispela samting em i lo bilong God. Olgeta man i mas bihainim. Maski sapos stilman i winim kot, tasol long bel bilong em yet em i save, em i bin stilim samting. Em i mas bekim bek.

Na narapela pasin bilong



Bisop Bernarding
(i go long pes 10)



VITA

VILLAGE
TECHNOLOGY
HANDBOOK

GUTPELA BUK TRU (long tok Ingflis) BILONG HELPIM OL TISA BILONG RURAL DEVELOPMENT. Kos bilong em: K4.65. Mipela i baim pos.

Salim i kam long:
Wantok - Box 1982 - Boroko.

WARA I KAM LONG STON

Bipō bipo, tru wanpela liklik ples ino gat wara. Dispela ples nem bilong en Tipinini. Long dispela ples i gat tupela man na meri. Nem bilong tupela em Lemeyan na Lakeyam. Lemeyan em man Lakeyam em meri. Long dispela taim tupela i no gat wanpela pikinini, tupela em tupela tasol i stap.

Tupela i stap i go na man Lemeyan em wok bilong en long pulimapim wara na brukim paiaut. Meri Lakeyam em wok bilong en long wokim gaden na lukautim pik.

Orait nau, Lemeyan em save i go pulimapim wara we em Lakeyam em i nō save. Lakeyam em save pilim olsem, i no gat wanpela wara i save i kam long hia na Lemeyan em save kisim wara long wanem hap tru?

Orait, wanpela taim san i lait gut tru nā gutpela taim tru i kamap. Orait, Lemeyan wantaim Lakeyam tupela i stap klostu long haus dua bilong tupela. Tupela i sindaun na tupela lukim wanpela pisin i plai i kam i kam na sindaun antap long wanpela diwai klostu long haus dua bilong tupela, na em lusim wanpela pinga kapa bilong pik. Na Lemeyan em lukim i pundaun long graun na em i kisim.

Na tupela lukim pinis, nau na Lemeyan i kirap na askim pisin, ya na tok, "Bilong wanem yu karim dispela pinga kapa bilong pik i kam na givim long

mitupela. Em i tokim pisin olsem, "Yu lukim wanpela man i indai na i kam, o wanpela pik i lus na yu i kam, o wanpela man i kilim pik na ol salim tok long yu loh i kam kisim mi, o yu olsem wanem tru na yu i kam?"

Orait nau, pisin ya i tanim tel bilong en na tok, "Nogat." Orait, Lemeyan, i askim em gen na tok, "Ol sampela lain man ol i mekim bikpela pati na ol i kilim pik bilong ol na ol salim tok tok nabaut long ol geta ples na ol salim tok long yu long i kam kisim mi o olsem wanem? Lemeyan tok, olsem nau, pisin i harim dispela tok rīa em daunim het bilong en na em kirap raunim haus na rausim wanpela tel bilong en na em lusim klostu long pes bilong Lemeyan na em i plai i go.

Lemeyan em i kisim dispela tel bilong pisin na em kirap tokim Lakeyam na tok, Pisin ya em tok save long mitupela pinis na mi bai i go long dispela pati, na yu i mas stap long haus. Na yu lukautim pik bilong mitupela i stap. Orait, Lakeyam em i tok, "Orait. Tasol, yu i mas redi long paiawut wantaim wara bilong mi na yu i go."

Orait Lemeyan i harim tok bilong Lakeyam na em i hariap tasol brukim ol paiawut na hipim i go inap pulap tru long haus. Orait em kirap katim 4-pela longpela mambu na em hariap tasol em i go puli-




mapim wara long ples em save i go pulimapim long en. Orait em pulimapim pinis em karim i kam na em i putim long haus pinsi na em i sindaun liklik na

em tokim Lakeyam na tok, Nau bai mi wokabaut i go na mi silip namel long rot, na tumora mi wokabaut i go na bai mi inap kamap long ples bilong pati, na

bai mi inap long silip na narapela de em ol inap long statim pati. Na mi kaikai i stap inap wanpela de na narapela de long en (i go long pes 13)

TULTUL TITAN



Lukim bulmakau i apim waia? Em bai ranawei. Em apim banis long wanem tupela pos i sanap longwe na waia long namel i slek.

Sapos banis bilong yu i olsem yu mas putim DROPA. Em olsem pos tasol yu no nap planim long graun. Em bai taitim waia.

Titan (NG) Pty Ltd. P.O. Box 25 Lae Ph 423988. 423497

SKRAP LONG MANI PAULIM PLANTI

(i kam long pes 8)



Bisop Cohill

bekim, ol Kristen i mas bihainim em dispela: Taim yu kisim dinau, o yu baim wampela samting, yu no ken hapim tasol pe na tromoim i stap. Nogat. Yu mas bekim pe olgeta.

STRONGPELA DRING

Olgeta pasin i no stret i save wok long bagarapim kantri. Ol i olsem ol waitpela anis i go insait long haus na kaikaim olgeta diwai na timba na pos bilong em. Wampela kain samting i hariap moa long pinisim dispela kantri, em i pasin bilong spak spak nabaut.

Tude Papua Niugini i kamap narakain tru, i ples bilong pret. Long wiken

bilong fotnait, taim nogut tru i save krungutim olgeta siti na taun. Yu laik wokabaut long lek o long ka, graun lukaut. Isi tumas yu ken painim birua. Planti taim wampela lain o grup o komyniti i laik mekim selebresen o liklik o sing-sing samting, na ol i no inap. Long wanem sampela spakman i bin kamap. Na sapos ol spakman i stap, bai ol samting i paul nabaut na i bagarap.

Sampela papa bilong famili i dring planti, na ol famili bilong ol i hangre, i no gat gutpela sindaun. Long sampela hap ol klap bilong ol yangpela pipel i no ken op long nait, long wanem ol spakman i save kam insait. Bikos ol draiva i save dring, ol rot na haiwe i ples nogut tru long ol wiken.

Na pasin bilong mekim bikpela pati long ples na viles - wantaim bia na strongpela dring - em i gro moa na moa nau. Tude

pati em i min dring, em i min spak. Sore. Tude planti viles i resis long mekim pati.

Long ol dispela kain pasin, ol bikpela man long gavman na bisnis i mas go pas givim gutpela eksampel.

Bilong helpim ol pipel na helpim kantri na ol famili, yumi mas taitim bun tru long pasim rot bilong pasin spak. Sapos nogat, bai kantri i bagarap stret. Mipela i



Asbisop Hoehne

askim ol papa na mama long sindaun stretim tok long dispela samting. Mipela i askim ol yangpela man long ting long ol dispela samting: pasin spak i ken bagarapim laip bilong

ol, i ken pasim rot bilong go het, na i ken mekim bai i no gat meri i laik maritim ol. Na ol yangpela meri i mas tingim dispela samting: sapos yu save dring bipo yu marit, bihain yu marit pinis, bai yu mekim moa moa yet.

Lo tasol i no inap stretim dispela bikpela wari bilong spak na dring. Mipela i askim ol plisman long i no larim ol spakman i kirapim pait nabaut. Kot i mas putim bikpela hevi long ol spakman i kirapim pait.

Mipela i askim olgeta komyniti na provinsal gavman long wokim sampela program bilong pasim rot bilong pasin spak. Sapos em i go moa moa yet, em inap long paulim insait bilong kantri bilong yumi, na bagarapim ol pipel bilong em.

LAS TOK

Yes, yumi independen. Yes, yumi fri nau. Tasol

yumi mas ting: yumi bikpela manmeri pinis. Olsem na yumi mas wari bai yumi yusim gut dispela pasin fri. Nogut yumi bagarapim na lusim. Lus pinis, bai yumi hatwok tru long kisim bek.

WES IRIAN



(i kam long pes 5)

man i kamap sitisen bilong PNG, em i min em i mas pinis olsem sitisen bilong as kantri bilong em. Kamap sitisen i min yu tok tru antap long sambai long PNG. Em i min yu bilong PNG nau. Nogut yumi painimaut sampela pipel i bin trikim kantri na i kamap sitisen giaman. Dispela i krungutim gutnem bilong sitisensip bilong PNG.

Bihain gavman bilong Papua Niugini i glasim gut dispela stori long ol sitisen i kamap Irian Jaya kabinet memba, mi bai autim tingting bilong gavman long pasin bilong mekim save long ol.


Aveling Barford Pacific Pty. Ltd. For your civil engineering, agricultural and domestic machinery.

Graders
Weight range 11,000-19,000 kg
All Wheel Drive and Steer
Conventional
Leaning Wheel
Hydraulic Controls
Powered by Leyland or
G.M.
Powershift or Standard
Transmission



Front End Loaders
Bucket Sizes of 1.3 cu.
metres to 3.82 cu. metres
Pivot or rigid frame available
Logging Attachments

Rollers
Vibratory Rollers
Self-propelled or Towed
Hydrostatic Drive
Pivot Steer
Asphalt Conversion
Padfoot Roll



Head Office: Ume St., Gordon, Port Moresby,
P.O. Box 6457. Phone 257166. Telex 22206.
Lae Depot: Morobe Ave, P.O. Box 1191, Lae.
Phone 424188. Telex 42411.

WATPO PROVINSAL GAVMAN

Taim Pater John Momis, Minista bilong Bosim ol Provins, i bin toktok long stat bilong Morobe Provinsal Gavman long 7 Epril na taim tok bilong em i bin kamap long Oro Provins i bin winim namba wan yia bilong em, planti aidia bilong em i wankain. Ol sampela i stap hia.

As bilong wokim planti nupela provinsal gavman, em i bikos gavman i strong long dispela samting: planti pipel moa i mas insait long mekim kantri i go het. I no samting bilong gavman na ol opisa tasol. Nogat. Em i kantri bilong ol pipel; ol pipel yet i mas ranim na ol pipel yet i mas taitim bun bilong mekim em i go het. Na dispela samting i moa isi sapos gavman i surik i kam daun long ol pipel na i no stap longwe long Mosbi na Waigani samting. Gavman i no laik bosman; em i laik poroman na wanwok.

Gutpela provinsal gavman i mas painimaut, ol pipel long as ples i ting wanem, ol i laikim wanem, ol i no laikim wanem samting.

Olsem na bikpela samting em hia: ol pipel long as ples i mas save gut: gavman em i wanem samting, gavman i laik mekim wanem samting, gavman i laik ol pipel i mekim wanem samting.

Yumi mas yusim pipel. Pipel i namba wan samting bilong dispela kantri, i namba wan samting i gat save insait long en yet, i namba wan samting i ken wok.

Bikos provinsal gavman i nupela samting, sampela lida insait long ol provins i stat long pilim pawa bilong ol. Nogut ol i ting ol i antap long nesanel gavman. Ol i aninit long Konstitusen, na Konstitusen i strong long yumi olgeta wan wan i mas wok' gut wantaim. Wok bilong provinsal lida, em i bilong stap olsem wanpela bris namel long ol pipel na nesanel gavman. Em i stap klostu long ol pipel na olsem em i ken harim ol laik na wari bilong ol na helpim ol.

Mipela i save dispela wok bilong kamapim ol provins, em i nupela samting long PNG. Olsem em i no samting bilong ran hariap. Em i samting bilong go isi isi pastaim. Na mipela tu i ken wetim sampela birua i stap long rot. I gat sam-

pela man tu i no laikim dispela nupela samting. Tasol maski long ol man i toknogutim mipela. Mipela long nesanel gavman i strong long go het wantaim provinsal gavman.

Sampela taim nesanel na provinsal gavman i save pait liklik. Tasol pait i no helpim yumi. Yumi save lusim strong nating long pait. Sapos yumi gat kain kain aidia, orait, yumi sindaun toktok, paitim tok. Tasol yumi no ken pasim yau na pasim ai na pasim het. Pasin olsem i pasim rot.

Ol lida i no ken lusim ting long dispela samting: ol pipel yet i bin votim ol na ilektim ol. Ol votman i mas lukaut gut bai ol i ilektim gutpela man. Sapos nogat, ol yet bai painim hevi na em i asua bilong ol yet.

Lida tru, em i man i lus tru long helpim ol pipel na i no wari long poket bilong em tasol. Lida em i man bilong helpim arapela man; na i no long helpim em yet.



Pater John Momis

MAKIM MANI LONG YUT

Ol deliget bilong 34 komonwelt kantri i bin kibung long biktaun Ottawa long kantri Kanada na i laik helpim tru wanpela komonwelt yut program, bilong helpim sindaun na go het bilong ol yangpela pipel long ol komonwelt kantri.

Komonwelt Yut Kaunsil i bin tok orait long givim K123,000 kina long ol Pasifik Ailan gavman (olsem Papua Niugini) long trenim ol opisa inap long ranim olkain progam bilong helpim ol yut, o yangpela pipel.

Dispela pe em i bilong wanpela yia na ol i laik bai ol manmeri i winim kos, i kisim setifiket

Soka - Basketbal - Ragbi - Tennis - Pising - Golp Skwas - Daiving - Kriket.

Ol dispela samting i pulap long stua bilong mipela. Sapos yu laik baim - yu kam stret long stua bilong mipela. O sapos yu laik, yu ken salim pas i kam long mipela.

Oil Company Services Pty Ltd.,
P.O. Box 582, Wewak Telipon: 86.2373

"Man i lukim pasin nogut na i pasim maus i stap, em i save mekim hevi i kamap. Tasol man i opim maus long stretim pasin nogut, dispela man i bringim bel isi.

"Pasin bilong i no laikim arapela man, i save kirapim hevi. Tasol pasin bilong laikim arapela man, em i ken karamapim olgeta pasin nogut.

"Man i gat save, em i save toktok wantaim tingting."

King Solomon bilong Olpela Testamen i raitim dispela tok.

BAIM WANTOK

Sapos yu laik kisim Wantok niuspepa inap long wan yia (em i olsem 48 taims), yu katim dispela tiket long sisis na yu salim i kam long mipela wantaim K8.00.

Nem bilong yu.

Adres bilong yu.

Salim sek o mani oda inap long K8 wantaim tiket i kam long :

WANTOK BOX 1982 BOROKO

Sapos yu bilong wanpela skul o misin o klap o grup na yu laik kisim moa olsem 10-pela Wantok olgeta wik, orait, yu rait i kam long mipela na mipela i gat spesel prais long dispela kain samting.

Prais bilong go long Australia: K14.50 na long Amerika na Yurop long sip em i K18.20 na long balus em i K24.00.

SALARIES OF MEMBERS OF PARLIAMENT

Pursuant to its duty under Section 13(1) of the Parliamentary Salaries Tribunal Act 1975, the Tribunal is reviewing the salaries of Members of Parliament.

Interested persons, organizations and associations are invited to submit in writing any views they consider should be taken into account in this review.

Submissions are requested by 5th May, 1978 and should be forwarded to:- The Executive Officer,
Parliamentary Salaries Tribunal,
P.O. Box 2374,
Konedobu.
Telephone: 271324, Mr. Doctor.

Submissions will be available to the public, unless, in special circumstances the Tribunal determines otherwise.

PE BILONG OL MEMBA BILONG PALAMEN.

Olsem seksin 13(1) bilong lo hia, Parliamentary Salaries Tribunal Act 1975, i tokaut na oraitim, dispela lain bai i lukluk gen long pe bilong ol Memba bilong Palamen.

Husat manmeri, kain kain lain na asosiesen i gat tingting long dispela samting, ken raitim wanem tingting bilong em na salim long dispela lain mas tingim taim i lukluk gen long pe.

Ol tingting long pas i mas kamap inap long 5th Me, 1978 na mas i kam long adres o nem hia:-

The Executive Officer,
Parliamentary Salaries Tribunal,
P.O. Box 2374,
KONEDOBU.

Telephone: 271324, Mr. Doctor.

Ol pipel i ken save long ol tingting dispela lain i bin kisim. Tasol, nogat, sapos lain hia i gat narakain tingting long sampela arapela samting.

PALAMENT MEMBAS EDIA DAVANA.

Inai taravatu, Parliamentary Salaries Tribunal ena seksin 13(1) ese inai orea sialu bona maoro ia henia Palament Membas edia davana do ia haeroa lou.

Taunimanima, eiava idau idau bema mai emu laloe inai gauna dekenai be emu laloe siaia mai vadaeni inai orea ese do ia itaia inai dava ia haeroa lou neganai.

Laloe ibounai be pepa dekenai siaia mai, 5th May, 1978, do ia abia lasi lalonai, bona inai gabu dekena oi siaia moi:-

The Executive Officer,
Parliamentary Salaries Tribunal,
P.O. Box 2374,
KONEDOBU.

(Telephone: 271324, Mr. Doctor).

Taunimanima be inai orea ese ia davaria lalonhadai be do idia itaia diba. To taunimanima do idia itaia lasi bema inai orea be gau haida totana laloe idau haida ia davaria neganai.



PUTIM PRAIS

Dia Edita - Mi laik autim wari bilong mi. Wari bilong mi em i olsem: Mi lukim yupela i putim kain kain piksa, piksa i soim olsem:

Masin bilong samapim samting, Singer, na ka, Yamaha, na Honda, motobaik na liklik masin o ensin mota bilong spitbot, na taiprait.

Na olgeta samting moa mi i no putim nem bilong olgeta samting. Mi ting olsem: Yupela inap putim piksa wantaim pe bilong dispela samting tu o nogat?

Yupela i putim piksa wantaim pe inap man i lukim na baim dispela samting. Na putim adres tu. Em tasol wari bilong mi.

Husat wantok i lukim dispela pas orait bekim long Wantok Niuspepa na mi lukim.

Sankarac Somi,
Heldsbach/Finschhafen.

Bekim tok
Em i no pasin bilong edvetais long putim prais bilong bikpela samting olsem ka na motobaik samting. Prais bilong kaikai o samting olsem, yes. Oltaim i gat adres we yu ken baim dispela samting olsem Ela Motors. Sapos i no gat adres, olsem bilong Singer, em i min yu ken baim long planti stua nabaut long taun.

KAUNSIL NO KEA

Dia Edita - Mi wanpela viles developmen man. Mi bin wok long ol pipel long viles inap 12 na hap yia nau. Na mi no gat amamas long wok bilong lokal gavman kaunsil na eria atoriti long Manus Provins.

Ol kaunsila na komiti kaunsil ol i no sapotim gut wok bilong ol pipel long ples. Ol i save daunim tumas wok bilong et pos, skul, klap bilong ol meri, wok bung bilong ol viles, na ol lapun manmeri.

I luk olsem Manus Lokal Gavman Kaunsil na Eria Atoriti i no skulim gut ol kaunsila na komiti bilong ol.

Mi wanpela man i kirapim wanpela skul bilong ol manmeri i lus long standet 6 na fom wan. Mi kirapim planti Ikonmik bilong ol pipel. Tasol mi no save kisim sapot i kam long mama gavman. As bilong en em ol kaunsil na komiti bilong ol i no amamas wantaim pipel. Ol i skulim pipel bilong no amamas wantaim.

Husat i laik kisim moa klia long pas bilong mi long rait i go long Wantok Niuspepa.

David Drayew,
Manus.

BIA I BOS

Dia Edita - Mi laik autim sampela tingting bilong mi long Wantok Niuspepa. O yes mi save harim sampela man i tok. Yumi PNG Independen kantri yumi no ken wari. Yumi mas dring bia na amamas. Tasol bihain long dispela?

Tri o 4-pela man i go long rot na ka i kilim wanpela bilong ol na ol i kirap na givim hevi long papa bilong ka.

Na papa bilong ka i save baim bikpela mani i go long bodi bilong man i dai. Na bihain papa bilong ka i save hatwok long painim mani gen.

Olsem na mi pilim insait long dispela i no gutpela pasin. Long wanem ol i tok yumi PNG. Em fri kantri. Wanpela samting ol i no save tanim na lukim bihain bilong ol. Ol i pulap long givim bikpela hevi. Dispela kain pasin i stap long Hailans pipel.

Olsem na ol slev bilong bia, bia i bosim ol. Bia i masta bilong ol. Olsem na ol i no inap stap gut wantaim na lukautim wan wan bilong ol. Em tasol tok bilong mi.

Muna Hosapa,
Bena-Bena/E.H.P.

Stori tumbuna i go moa

Joe Nandawa bilong Enga i raitim dispela stori.

bai mi inap i kam silip long rot. Na sikis de long en bai mi inap kamap long haus.

Na em i tokim Lakeyam olsem, "Yu i no pinis im wara hariap, inap long 5-pela de. Na long sikis de long en yu pinisim long moningtaim samting i orait."

Orait nau, Lemeyan em i kirap em kisim ston akis bilong en na em i kisim banara bilong en, kisim olgeta bilas bilong en na em karim bilum bilong en na em kirap i wokabaut i go i go na tudak na em i silip long rot. Orait narapela de em kirap kukim kaikai na em kaikai pinis long moningtaim tru em kirap i go i go na long apinun tru em kamap long ples bilong pati. Dispela ples ol man i mekim pati long en nem bilong en, LHIYAMA.

Lemeyan em i go kamap na em silip wantaim ol planti man ol bilong narapela ples nabaut, ol i kam na ol silip bung long wanpela haus man tasol. Lemeyan em i silip wantaim ol. Orait long neks de

olgeta man i kirap long moningtaim na ol lain stap. Orait ol lain man bilong mekim pati ol i lainim planti pik tru. Na olgeta ol lain man bilong narapela ples ol i kam lukim pati long en, ol i lukluk i stap.

Na ol man bilong mekim pati long en ol skelim tu, tu pik long wan wan man bilong ol narapela ples. Ol i kam lukim pati long en. Orait ol i mekim olsem pinis orait olgeta ol bikpela pik long en olgeta ol kilim. Olsem nau Lemeyan, em katim wanpela pik i stap. Na wanpela pisin i kam na sindaun antap long lek bilong en, na Lemeyan i guria liklik na em i lukim olsem pisin ya i gat wanpela hap purpur wantaim lip bilong kaukau i gat wara long en. Em lukim na Lemeyan em pilim pinis olsem, wara i kam na pulap pinis na daunim haus na gaden bilong en.

Orait em kirap tokim olgeta man, wara i bagarapim gaden na haus na ples bilong mi bagarap pinis na mi i go nau na yupela i stap. Orait em kirap kisim

bilum bilong en na em karim na kirap i go. Em ran tasol, i kam na em i kam i stap long wanpela maunten na em lukluk i go na em lukim ples bilong en i wait nablu na i pret olgeta.

Orait em hariap tasol em i go na em holim wanpela stik kanda bilong en i kam. Em i kam i kam na kamap long wara i pulap i stap long en. Orait em paitim wara long stik kanda bilong en, orait wara i go i go nabaut nabaut. Em mekim olsem an em i kam i kam na em kamap long haus bilong en. Na em lukim meri bilong en Lakeyam wantaim pik bilong en i no istap. Orait em i go antap long ples em i save go kisim wara long en. Na em i lukim tupela i stap antap tru long maunten na lukluk i kamdaun.

Orait em i go antap na tokim Lakeyam. "Olsem wanem na wara i bagarapim ples?" Lakeyam i tokim em na tok, "mi painim wara na mi bihainim rot we yu save i kam pulmapim wara long en. Orait, mi

i kam na mi redi long pulimapim wara na mi pulim stik yu save pasim long en, na mi pulimapim pinis na mi pasim gen ya, nogat. Wara i sut olgeta na strong moa na mi lusim. Em nau wara i ron i go na ples i kamap wara tasol.

Orait nau Lemeyan i kros nogut tru na em tokim Lakeyam na tok, "Yu wantaim pik yutupela i ken sindaun istap long maunten, na mi i go daun na stretim wara gen na mi kolim nem bilong ol wara. na bihain tru bai olgeta man bai save long nem bilong ol wara.

Em nau em kolim nem bilong ol wara long en, nem bilong tupela wara em Kaiya na narapela em Komaiya. Em dispela tupela wara em i kam long dispela ples tipinini nau em i kam yet. Na dispela wara Lakeyam hapim long en tu em i kam autsait long Ston na meri Lakeyam wantaim pik tupela i stap arere long Ston maunten.

Em tasol liklik stori bilong mi.

NUPELA KOMISIN BILONG STRETIM KONSTITUSEN

Praim Minista, Mista Michael Somare, i tok olsem, gavman i laik wokim wanpela komisin long mun Septemba bilong glasim gut Konstitusen na stretim sampela tok insait long en.

Mista Somare i tok, ol i bin hariap long wokim Konstitusen namba wan taim na olsem sampela asua i bin kam insait long en. Nau ol i laik stretim. Na bilong mekim dispela wok, ol i laik makim 9-pela spesel pipel:


- tupela man bilong politik wanpela bilong na narapela bilong Oposisen
- man bilong makim ol provinsal gavman
- man bilong makim ol lokal gavman kaunsil
- loman i save tumas long ol lo bilong palamen
- wanpela saveman bilong wok politik
- wanpela meri bilong makim olgeta meri bilong kantri
- tupela loman bilong makim ol sios

SAMTING TRU..

bilong olgeta
tisa
skul
laibreri

Pulap long

- . poto
- . nius
- . stori tumbuna
- . ileksen nius
- . 500 pes olgeta



K5 tasol....

Hia em i K5 bilong mi. Yu salim Wantok buk i kam long mi.

NEM:

ADRES:

Salim i kam long: **WANTOK**
P.O. Box 1982
Boroko

TAUN JERIKO I LUS


(Josua 4:1 - 6:20)

I olsem wanpela bikpela han i pasim wara Jodan na ol i no ran. Na ol Isrel i kamap long kantri God i bin promisim ol long kisim. Bihain Josua i tokim wanpela man bilong wan wan bilong ol 12-pela lain bilong karim wanpela ston i kam.

Yupela karim ol dispela ston i go long kem. Bihain mipela i ken lukim na tingim dispela de mipela i bin brukim wara Jodan.



Bihain Josua i sanapim narapela 12-pela ston namel long wara we ol pris i sanap holim bokis kontrak. Nau ol pris i kam arasait long Jodan na wara i ran gen.



Ol Isrel i putim namba wan kem long ples Gilgal - na hia ol i mekim selebresen Pasova namba wan taim long nupela kantri.



OL SOLDIA LUSIM STRONG

(Josua 6:20 - 7:4)



Inap 6-pela de ol Isrel i wokabaut raun long Jeriko wanpela taim. Long namba 7 de ol i raun 7-pela taim. Ol pris i winim biugel na ol pipel i bikmaus... na ol banis bilong Jeriko i bruk i pundaun.

Jeriko i lus.

Used by permission of the David C. Cook Foundation. Copyright 1973, David C. Cook Publishing Co. All rights reserved.



Na hia tu ol i painim prut na kaikai Lukim - inap kaikai long mipela olgeta Yumi tenkim God. dispela i gutpela kantri tru.

Nau ol pipel inap painim kaikai bilong ol, olsem na mana i no kam daun moa, olsem em i bin mekim inap 40 yia nau.

Taim ol pipel i sindaun wokim haus bilong ol, Josua i lukluk raun na i ting long we bilong kisim taun Jeriko. Nau em i lukim wanpela man i sanap i holim wanpela bainet.



Ating em i laik kilim mi.

Tasol Josua i no pret em i sanap toktok wantaim dispela man

Yu pren o yu birua?

Mi kepten bilong ami bilong God.



Yupela painim Rehap long wanem em i bin helpim mipela, bringim em na famili bilong em i kam long kem bilong mipela.

Tupela skaut i lukluk nabaut long ol pipia, long painim haus bilong Rehap

Lukim - em haus i gat retpela baklain i hangama long windo..



Bai mipela bagarapim olgeta samting long taun. Yu na famili bilong yu i mas kam wantaim mipela.

Ona long God.

Ol soldia bilong Isrel i mumutim olkain gol na bras samting bilong bilasim haus sel bilong God.

Man, lukim dispela naispela klos.

Maski - Josua i tok yumi no ken kisim samting bilong yumi yet.



Na yu gat wanem tok?

Tekewe su bilong yu. Dispela graun i holi.




Josua i harim tok.

Yu mas mekim olsem bilong winim Jeriko.



Bihain ensel i go pinis, Josua i kam bek long kem na bungim ol pris.

Yupela mas karim bokis kontrak na wokabaut raun long biktaun Jeriko. Na 7-pela pris i mas go pas na winim biugel.



Inap 6 de stret ol Isrel i wokabaut raun long Jeriko, wanpela taim long de. Rehap i stap insait long haus na lukim ol.

Ol Isrel i no statim pait yet olsem na ol pipel i guria nogut tru.



Na ol soldia wasman long ol taua i pret.

Ol i mekim wanem, wanpela singsing?

Mi no save. Tasol ol soldia bilong mipela i pret.

Long namba 7 de ol Isrel i wokabaut raun long Jeriko inap 7-pela taim. Ol pris i winim biugel na ol pipel i singaut strong moa.



Tasol wanpela soldia, Ekan, i agris.

Bilong wanem mi mas pait na i no kisim pe long wok bilong mi? Maski, mi haitim sampela gol samting.



Long nait taim ol pipel i slip em i haitim ol bilas long graun.

Em bai helpim mi long dispela nupela kantri.



Orait, nau ol i kukim Jeriko na Josua na ol soldia i sanap longwe na i lukim.

Bihain bai no gat wanpela samting i stap long dispela ples.


Em i ples nogut, na nogut pasin bilong em i kam insait long kem bilong mipela.



Long tumora Josua i singautim sampela skaut i kam.

Hia stap biktaun Ai. Em i pasim rot bilong mipela; yupela go na spai long en, na bringim tok save i kam bek.

Yes, mipela i mekim olsem long Jeriko.



Ol skaut ol i go hariap.

Gude....Mipela i go long ples Ai. Em i bikpela siti o nogat?

Ol i gat samting olsem 12,000 pipel na wanpela ami tu.



Ol skaut i kam bek na i laik givim gutpela nius long Josua.

Ami bilong ol i smolpela. Mipela inap winim ol na i arim ami bilong mipela i stap hia na malolo.



Josua i harim tok bilong ol skaut na i salim 3,000 soldia tasol i go.

THIS WILL BE EASY!



Tasol long dua bilong biktaun.

Olabo, lukim ol i ranawe. Ol i pret.

Em dispela ol soldia i bin kisim Jeriko pinis?



Poto long lephan i soim Mista Veuga Kila bilong Dipatmen bilong Praimeri Indastri i wok long skul bilong mekim wok dokta bilong ol bulmakau. Em i glasim blut bilong wanpela bulmakau meri bilong soim em bai inap karim pikinini o nogat. Sampela kau i gat wanpela kain sik i save kilim pikinini insait long bel bilong mama taim em i blut yet.

Poto i kam long Australian Information Service. Bob Peisley i kisim.

Poto daunbilo i soim Mista Mea Vui, wanpela tisa bilong Waigani Praimeri Skul long Moresby, i skul long pasin bilong tromoim spia. Narapela wantok bilong Port Moresby em Mis Shirley Baptiste (em i sanap long raithan na i pasim waitpela singlis) em tu i insait long dispela spesel skul bilong olkain spot. Mis Baptiste em i opisa long Dipatmen bilong Spot na Pilai.

Poto i kam long Australian Information Service. Mike Brown i kisim.

